



«Uns git's»

Die Verdreide Aesch Bl

Fasnacht 2023

Die erschti Fasnacht, was häisst daas scho?
vor drey joor syy miir uff Aesch choo
nur het eus siithär niemer welle:
mir sölle zersch e coronatescht bschtelle!

Im zwäiezwanzig denn, es het bressiert:
hän mir eus nach Ettige exportiert,
und dört die erschti fasnacht gmacht:
das isch halt nid die volli pracht!

Drum syy miir froh, chlappts äntlig jetzt,
e fasnacht wird doch halt scho geschätzt.
Und die doo z Aesch, s isch eus no wichtig,
isch ebbe die einzig würlklich richtig.

Zur Gründig zrug, «wär wänn miir syy?»
froge mir uns bimne gleesli wyy.
Und finde bald au unsre naame:
«Die Verdreide» chunnt uf unsri Fahne!

Mir drääie drab und drääie draa,
muesch immer wieder schruube ha.
Drum gheie mir jetzt au nüm duure,
hän immer e schruube in dr schnuure.

Die neechschi sach, ii chas dr saage,
uns fehlt jo no e waggiswage.
Uf tutti finde mir e buur,
nur wohnt dää siech in winterthuur.

Bevor miir äntlig aaföön baue,
düen mer eus erschtmol d chöpf iihauue,
wies am schluss jetzt usseh sott,
will jede öppis anders wott.

Mer syy denn froo, wo s Chalet stoot:
Wie gschnäll die Zyt doch als vergoot!
Heschs jetzt denn gschafft, bisch gly am änd,
gib's zue, dr zeedel fallt dr us de händ.

Die letschti Froog, wo sich no stellt,
isch, waas dä Waage doo verzellt?
Uusspiile chönne mer jo nüt,
will s 2021 gaar käi Fasnacht git!

Was chönnt denn euser Sujet syy?
mir lön uns lieber gar nid yy,
und fyyre drum - nid ohni witz -
ganz eifach nur «Juhee – uns git's!»

Wär uns noo däm joochr noonig kennt,
dä het die fasnacht schlicht verpennt!
für dr allerschönschti Waage doo
hed männgs Bierli s Lääbe gloo!

Bald isch die Fasnacht wiider Gschicht
Miir bhalte troztdäm gäärn e Gsicht,
drum folg eus doch uf Instagram
Dört erfaarsch s ganz Joor s Programm

Und hesch grad voorigs Gäld drbyy?
Denn chasch au gärn no „Passiv“ syy!